

# Was merr so babbelt

Honnes, was mächsden die gonz Zeit hier im Keller?

Ich such was.

Ei was suchsde dann?

Moi Lochzongl

Doi Lochzong? Was issen dess ferr e Ding?

Doodemett kann merr Löcher mache.

Wo willsden die Löcher mache? In de Wond?

Naa, in moim Gerrdel. Wenn ich nor wisst wo die Zong iss.

Wie siehden dess Ding aus?

Dess iss so e Zong mett vorne emm Rädche droo.

Emm Rädche?

Ja, emm Rädche, was merr verstelle kann.

Unn warum kann merr dess verstelle?

Weil merr dann verschieden große Löcher mache kann.

Du willst verschieden große Löcher in doin Gerrdel mache?

Naa, nor oo Loch, awwer was so groß iss wie die onnern.

Unn dann konnsde doin Gerrdel enger schnalle?

Ja, weil ich e bissi abgenumme habb.

No endlich, wo doch die gonz Zeit schunn doi Hos rutscht.

Ja, unn desdeweche will ich e Loch in de Gerrdel mache.

Dann machs enol.

Deshalb such ich doch die Lochzong.

Doo mächsde ewe dess Loch mett was onnerstem enoi.

Mett was dann?

Doo nimmsde enn Dorschschlaach unn dann giehts aach.

Recht hosde, Fraa. Wo issen jetzt der Dorschschlaach?

Jetzt fängt die Sucherei schunn widder oo.

Hier hadd ich den enoigeleecht unn jetzt isser fort.

Gucke mol was hier leit – de Phaseprüfer!

Den habb ich die vorsch Woch gesucht.

Unn mich hosde geschennt.

Ich habb dich geschennt?

Ja, ich hätt den als Schrauwezieher genumme.

Was dut dann der Phaseprüfer bei de Hämmer unn Meißel?

Honnes, du sollst emol uffroome unn aach was fortwerfe.

Was soll ich dann fortwerfe, dess brauch ich alles noch.

Naa, dess Zeich hier brauchtsde all nimmi, schmeiß ess fort.

Mach ich nitt, ich häng doch onn dem ahle Gescherr.

Ich häng doch aach onn dem ahle Gescherr, Honnes.

So? Du aach?

No klar. Wie long sinn merr jetzt verheirat?

Zwaaunn...

Dreiunn...!

Ja, dreiunnfuffzisch Johr.

Siehsde.

Eiern Honnes